



Bosna i Hercegovina
Federacija Bosne i Hercegovine
Tuzlanski kanton
GRAD GRADAČAC

H.K.Gradašćevića 74, 76 250 Gradačac, telefon/fax 035-369-770, 035-369-771, e.mail: vijece@gradacac.ba, www.gradacac.ba

NACRT!!!

Na osnovu člana 13. stav 2. alineja 12. Zakona o principima lokalne samouprave u Federaciji BiH („Službene novine Federacije BiH“ broj: 49/05 i), člana 6. stav 1. tačka 14. Statutarne Odluke o organizaciji Grada Gradačac u skladu sa Zakonom o Gradu Gradačac („Službeni glasnik Općine Gradačac“ broj: 1/19) i člana 11. Stav 4. Statuta Općine Gradačac („Službeni glasnik Općine Gradačac“, broj: 4/08, 5/12, 1/17, 5/18, i 8/18) koji se primjenjuje na osnovu člana 22. Stav 2. Statutarne Odluke o organizaciji Grada Gradačac u skladu sa Zakonom o Gradu Gradačac, Gradsko vijeće Gradačac, na ____ sjednici, održanoj dana _____, d o n o s i

ODLUKU
o priznanjima i nagradama grada Gradačac

I.OSNOVNE ODREDBE

Član 1.

Ovom odlukom utvrđuju se priznanja i nagrade grada Gradačac (u daljem tekstu: priznanja i nagrade), u cilju javnog isticanja zahvalnosti za učinjenu dobrobit pojedinaca, ustanova, preduzeća i drugih pravnih lica u odbrani domovine, razvijanju demokratije, podsticanju pojedinačnih i zajedničkih inicijativa i stvaralaštva u svim oblastima života i rada od općeg društvenog interesa, te se utvrđuju vrste priznanja i nagrada, kriteriji, postupak predlaganja, donošenja odluke i dodjele Priznanja i Nagrade, njihov sadržaj, izgled, te postupak opoziva priznanja i nagrade.

Član 2.

Priznanja i nagrade grada Gradačac su:

1. Zlatni grb grada, sa novčanom nagradom od 2.000,00 KM – (jedno priznanje)
2. Plaketa “Zlatni zmaj” sa novčanom nagradom od 1.000,00 KM – (dva priznanja)
3. Počasni građanin – (jedno priznanje)
4. Zahvalnica grada Gradačac.

Član 3.

Priznanja i Nagrade iz člana 2. ove Odluke mogu se dodjeljivati pravnim ili fizičkim licima, državljanima drugih zemalja, prijateljskim gradovima, međunarodnim organizacijama, organizacijama i ambasadama drugih država ili njihovim tijelima.

II.USLOVI ZA DODJELU PRIZNANJA I NAGRADA

Član 4.

Zlatni grb grada je najviše gradsko priznanje.

Zlatni grb grada dodjeljuje se za najviša dostignuća, doprinos i postignute rezultate u odbrani Gradačca, oblastima nauke, privrede, prosvjete, kulture, umjetnosti, sporta, zdravstva, socijalne zaštite, spašavanja ljudi i imovine, unapređenje i afirmaciju demokratije, tolerancije, kulture dijaloga i drugih oblasti i uslova života u Gradačcu ili pojedinim njegovim dijelovima, te afirmaciju ugleda grada Gradačac u Bosni i Hercegovini i inostranstvu.

Član 5.

Plaketa "Zlatni zmaj" dodjeljuje se za:

- dokazanog pobornika i borca u stvaranju države Bosne i Hercegovine;
- uloženi rad kojim se bitno utiče na rezultate u oblastima od posebnog društvenog interesa;
- zalaganje i rad kojim se stekao autoritet, ugled i priznanje na području grada Gradačac;
- moralne vrijednosti koje služe kao primjer rada, saradnje i tolerancije;
- dosljednost, upornost i beskompromisnost u borbi za ostvarivanje demokratskih odnosa na području grada;
- ispoljenu izuzetnu hrabrost i požrtvovanje u pružanju pomoći u prirodnim i drugim nepogodama;
- iskazanu izuzetnu građansku hrabrost, solidarnost, humanost i altruizam;
- naročit doprinos razvoju i učvršćivanju međunarodne ekonomske, naučne, kulturne, sportske i druge saradnje između grada Gradačac i drugih gradova, država i međunarodnih organizacija.

Član 6.

„Počasni građanin“ je priznanje koje se dodjeljuje građaninu Bosne i Hercegovine koji nije istovremeno i građanin grada Gradačac ili stranim državljanima koji se svojim angažmanom zalaže za dobrobit i ugled grada Gradačac kao cjeline.

Počasnim građaninom može se proglasiti osoba, državnik ili dužnosnik druge države, član međunarodne organizacije, odnosno organizacije druge države ili njihovih tijela, posebno zaslužna za:

- promoviranje i razvoj grada Gradačac ili pojedinih njegovih djelatnosti,
- razvoj međunarodnih i međuljudskih odnosa na načelma solidarnosti, demokratičnosti, humanosti i tolerancije među ljudima,
- unapređenje položaja i ugleda grada Gradačac, njegovih odnosa sa drugim gradovima u zemlji i inostranstvu,

-naročit doprinos razvoju i učvršćivanju međunarodne ekonomske, naučne, kulturne, sportske i druge saradnje između grada Gradačac i drugih gradova, država i međunarodnih organizacija.

Član 7.

Zahvalnica grada Gradačac je priznanje koje se dodjeljuje domaćim i stranim, fizičkim i pravnim licima za humanitarne aktivnosti, izgradnju civilnog društva, doprinos razvoju, izgradnji i unapređenju uslova života u oblastima od općeg značaja na području grada Gradačac, kao i za uspješnu saradnju, te za doprinos ugledu grada Gradačac.

Zahvalnica se može dodjeliti kao znak zahvalnost i odavanja priznanja i u povodu jubileja fizičkih i pravnih lica, za konkretan uspjeh i poduhvat na području Grada Gradačac.

Zahvalnica se može dodjeljivati u toku cijele godine, bez raspisivanja javnog konkursa, odlukom Gradonačelnika.

Gradonačelnik je dužan najmanje jedan put godišnje da podnese izvještaj Gradskom vijeću o dodijeljenim Zahvalnicama.

Član 8.

Dobitnicima priznanja i nagrade iz člana 2. tačka 1. ove Odluke ne može se po istom osnovu dodijeliti priznanja i nagrade iz tačke 2. ili tačke 3. istog člana.

III.SADRŽAJ I IZGLED PRIZNANJA I NAGRADA

Član 9.

Priznanje "Zlatni grb grada" je četverouglastog oblika, dimenzija 12 x 15 cm sa plavom plišanom podlogom i zlatnim grbom grada Gradačac u sredini.

Uz priznanje „Zlatni grb grada“ dodjeljuje se novčana nagrada u vrijednosti od 2000,00KM.

Član 10.

Plaketa "Zlatni zmaj" je dimenzija 19,5 x 29,5 cm, gdje je na čvrstoj podlozi, boje zlata, ispod zaglavlja i grba grada, ugraviran lik zmaja, te naziv "Zlatni zmaj" a ispod je ime i prezime sa kraćim tekstom iz koje oblasti života i rada se dodjeljuje priznanje.

Uz priznanje „Zlatni zmaj“ dodjeljuje se novčana nagrada u vrijednosti do 1000,00 KM.

Član 11.

Počasnom građaninu uručuje se priznanje u obliku Povelje.

Priznanje „Počasni građanin“ Grada Gradačac sadrži: u gornjem dijelu u lijevom uglu grb grada Gradačac, sa tekstom „Bosna i Hercegovina, Federacija Bosne i Hercegovine, Tuzlanski kanton, GRAD GRADAČAC“ centriranom na vrhu stranice formata A3.

Ispod teksta iz stava 2. ovog člana, ispisuje se sledeći tekst: „Gradsko vijeće Gradačac dodjeljuje Priznanje“.

Na sredini Priznanja je tekst “Počasni građanin“, ispod kojeg se navodi ime i prezime lica kome se priznanje dodjeljuje.

Ispod teksta iz stava 4. ovog člana navodi se za šta se konkretno Priznanje dodjeljuje.

U donjem lijevom uglu je simulacija pečata grada Gradačac ispod koje je oznaka broja odluke, datuma i mjesta, a u donjem desnom uglu je potpis Predsjedavajućeg Gradskog vijeća.

Član 12.

Zahvalnica se dodjeljuje u obliku diplome formata A4 u povezu tvrdih korica, a izgled se prilagođava svakoj konkretnoj situaciji.

IV. POSTUPAK PREDLAGANJA, DONOŠENJA ODLUKE O DODJELE PRIZNANJA I NAGRADA

Član 13.

Gradsko vijeće Gradačac dodjeljuje priznanja i nagrade iz člana 2. tačka 1.,2, i 3. ove Odluke.

Postupak dodjele priznanja i nagrada provodi Komisija za priznanja i nazive Gradskog vijeća Gradačac (u daljem tekstu: Komisija).

Član 14.

Komisija je dužna najkasnije do 1. Augusta tekuće godine u kojoj se priznanja i nagrade dodjeljuju, uputiti Javni poziv za podnošenje prijedloga (u daljem tekstu: Javni poziv), sa rokom do kojeg se prijedlozi za priznanja i nagrade mogu podnositi, a koji ne može biti kraći od 30 dana od dana objavljivanja.

Javni poziv objavljuje se na web stranici Grada Gradačac, Radiju Gradačac i Info panou Grada Gradačac.

Član 15.

Prijedloga za dodjelu priznanja i nagrada iz člana 2. tačka 1., 2. i 3. ove Odluke, odnosno isticanje kandidature, mogu podnositi građani pojedinci, boračke organizacije i udruženja, udruženja građana, nevladine organizacije, vjerske zajednice, privredna društva, javne ustanove, mjesne zajednice, klubovi vijećnika političkih stranaka-partija zastupljenih u Gradskom vijeću i Gradonačelnik.

Član 16.

Prijedlog iz predhodnog člana ove Odluke, podnosi se Komisiji, putem Stručne službe Gradskog vijeća, u pisanom obliku i sadrži:

- 1.Podatke o podnosiocu Prijedloga;
- 2.Vrsta priznanja ili nagrade za koju se kandidat predlaže;
- 3.Podaci o kandidatu za dodjelu priznanja ili nagrade (ime i prezime, biografija za fizička lica, te naziv i osnovni podaci o pravnom licu i njegovom djelovanju);
- 4.Obrazloženje nominacije.

Član 17.

Po isteku roka za podnošenje prijedloga, Komisija na temelju uvida u podnesene prijedloge, vrši ocjenu formalne ispravnosti prijedloga s aspekta sadržaja i roka podnošenja.

Izuzetno, ukoliko Komisija utvrdi da nije dostavljen dovoljan broj prijedloga po kojima se može odlučiti, rok za podnošenje prijedloga može se produžiti.

Prijedlozi koji budu podneseni izvan roka za podnošenje ili budu nepotpuni u pogledu sadržaja, neće se razmatrati.

Komisija utvrđuje da li podnešeni prijedlog ispunjava sve uslove za predloženo priznanje i nagradu te, ukoliko ne ispunjava, a ispunjava uslove za drugo priznanje i nagradu, isti može uz saglasnost predlagača usmjeriti za eventualno dobijanje drugog priznanja i nagrade iz člana 2. tačka 1., 2. i 3. ove Odluke.

Komisija utvrđuje Prijedlog odluke o dodjeli priznanja i nagrada sa obrazloženjem i istu dostavlja Gradskom vijeću na razmatranje i usvajanje.

Obrazloženje iz predhodnog stava, pored ostalih elemenata, obavezno sadrži listu kandidata čiji prijedlozi su od strane Komisije ocijenjene kao formalno ispravni.

Gradsko vijeće može izmijeniti Prijedlog odluke iz stava 5. ovog člana samo predlaganjem kandidata sa liste kandidata iz predhodnog stava, odnosno kandidata za kojeg je dostavljen prijedlog u toku trajanja Javnog poziva i čiji prijedlog je od strane Komisije ocijenjen kao formalno ispravn.

V. OPOZIV PRIZNANJA I NAGRADA

Član 18.

Priznanja i nagrade dodijeljeni u skladu sa ovom Odlukom, mogu se opozvati.

Priznanja i nagrade će se opozvati:

- a) ako je nosilac priznanja, odnosno nagrade pravosnažnom sudskom presudom osuđen od Međunarodnog suda za ratne zločine počinjenje na teritoriji bivše Jugoslavije,
- b) ako nosilac priznanja, odnosno nagrade svojim ponašanjem, javnim istupom ili govorom djeluje protivustavno i podriva sverenitet i teritorijalni integritet Bosne i Hercegovine ili na neki drugi način narušava ugled i dignitet grada Gradačac i Bosne i Hercegovine.

Član 19.

Opoziv priznanja, odnosno nagrada vrši se na prijedlog Komisije, Odlukom Gradskog vijeća.

VI. OSTALE ODREDBE

Član 20.

Stručna služba Gradskog vijeća vodi evidenciju o dodijeljenim priznanjima i nagradama.

Službi iz predhodnog stava dostavljaju se Odluka iz člana 7. Stav 3. ove Odluke u roku od 7 dana od dana dodjeljivanja iste, radi evidencije.

Član 21.

Iznos sredstava za realizaciju novčanih nagrada koje slijede uz dodijeljena priznanja, kao i sredstva za izradu priznanja obezbijedit će se u Budžetu grada Gradačac, za svaku budžetsku godinu.

Član 22.

Uručenje priznanja iz člana 2. tačka 1., 2. i 3. ove Odluke vrši se na Svečanoj sjednici Gradskog vijeća koja se organizuje u povodu 22. oktobra –Dana Grada Gradačac.

Član 23.

Priznanje, odnosno nagrada može se dodjeliti fizičkm licima i posthumno.

Član 24.

Stupanjem na snagu ove Odluke, prestaje da važi Odluka o općinskim priznanjima „Službeni glasnik Općine Gradačac“ broj: 7/06.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD GRADAČAC
-Gradsko vijeće -

Broj: 01-04-____/22
Datum, 23. 06. 2022. godine
G r a d a č a c

**PREDSJEDAVAJUĆI
GRADSKOG VIJEĆA**

Mustafa H.Ađulović

Obrazloženje:

Odluke o priznanjima i nagradama grada Gradačac

Pravni osnov za donošenje ove Odluke propisan je odredbom člana 13. stav 2. alineja 12. Zakona o principima lokalne samouprave u Federaciji BiH („Službene novine Federacije BiH“ broj 49/05 i 51/09), članom 6. stava 1. tačke 14. Statutarne Odluke o organizaciji Grada Gradačac u skladu sa Zakonom o Gradu Gradačac („Službeni glasnik Općine Gradačac“ broj: 1/19), članom 11. stavom 4. Statuta Općine Gradačac („Službeni glasnik Općine Gradačac“, broj: 4/08, 5/12, 1/17, 5/18, i 8/18). Statut Općine Gradačac primjenjuje se na osnovu člana 22. stav 2. Statutarne Odluke o organizaciji Grada Gradačac u skladu sa Zakonom o Gradu Gradačac.

S obzirom na činjenicu da je općina Gradačac na osnovu Zakona o Gradu Gradačac i Statutarne odluke o organizaciji grada Gradačac u skladu sa Zakonom o Gradu Gradačac imenovana Gradom, u skladu sa Programom rada Gradskog vijeća za 2022. godine Komisija za priznanja i nazive utvrdila novi tekst Odluke o priznanjima i nagradama Grada Gradačac u formi NACRTA, a radi uključivanja svih zainteresovanih za ovu oblast ponuđenu Gradskom vijeću.

Uzimajući u obzir da je odredbama člana 13. stav 2. alineja 12. Zakona o principima lokalne samouprave upotrijebljene termin „*nagradama i priznanjima*“ i da je članom 2. tačka 1., 2., i 3. nacrtu ove Odluke predviđeno da se uz priznanja dodjeljuju i novčane nagrade, Komisija je naziv ove Odluke prilagodila navedenim odredbama. Prilikom izrade teksta Odluke, Komisija je uzela u obzir primjedbe koje su iznesene na sjednicama Gradskog vijeća i radnih tijela Gradskog vijeća. Pored toga, Komisija je nastojala da normira pravne praznine koje su uočene uvidom u važeću Odluku o općinskim priznanjima („Službeni glasnik Općine Gradačac“ broj: 7/06), te je članom 6. i članom 11. nacrtu Odluke regulisala uslove i izgled priznanja „Počasni građanin“, uzimajući u obzir praksu u predhodnim godinama.

U odnosu na važeću Odluku o općinskim priznanjima, u članu 2. tačka 4. i članu 7. nacrtu ove Odluke predviđeno je novo priznanje Grada, iz razloga što se u praksi pojavila potreba da Grad Gradačac neovisno o složenoj proceduri zakazivanja sjednica i donošenja odluke Gradskog vijeća, prilikom posjeta delegacija vezanih za aktivnosti koje se sprovode u okviru Gradske uprave, odlukom Gradonačelnika iskaže svoju zahvalnost za humanitarne aktivnosti, doprinos razvoju, izgradnji i unapređenju uslova života u oblastima od općeg značaja na području grada Gradačac. U članu 12. nacrtu ove Odluke propisan je izgled Zahvalnice, dok se odredbe o izgledu ostalih priznanja nisu mijenjale u odnosu na Odluku o općinskim priznanjima, iz praktičnih i tradicionalnih razloga.

Odredbama ove Odluke sistematizovanim u poglavlju IV, od člana 13. do člana 17., regulisana je procedura raspisivanja i provođenja Javnog poziva za dodjelu priznanja i nagrada, te donošenje Odluke o dodjeli priznanja i nagrada, iz razloga što se u praksi pojavila potreba za detaljnijim regulisanjem samog postupka u odnosu na način kako je to regulisano važećom Odlukom o općinskim priznanjima. U poglavlju V, odredbama člana 18. i 19. uvedena je mogućnost opoziva priznanja i nagrada, razlozi i postupak opoziva.

Iznos sredstava za realizaciju novčanih nagrada koje slijede uz dodijeljena priznanja, kao i sredstva za izradu priznanja obezbijedit će se u Budžetu grada Gradačac, za svaku budžetsku godinu, kao što je to bila praksa i predhodnih godina.

OBRADIVAČ:
Stručna služba Gradskog vijeća
i Gradonačelnika

PREDLAGAČ:
Komisija za priznanja i nazive